



**Broj:** 02-04-722/20

**Datum,** 07.07.2020. godine

## **ZAPISNIK** **sa 37. redovne sjednice 6. saziva Općinskog vijeća Doboj Istok**

Tridesetsedma redovna sjednica 6. saziva Općinskog vijeća održana je dana 27.06.2020. godine u zgradi općine Doboj Istok, u Klokočnici, sa početkom u 10,00 sati.

**PRISUTNI:** 13 vijećnika, Kemal Bratić, općinski načelnik, Omer Hadžić, sekretar općine, Abdulah Hrnjičić, ovlašteno lice za zamjenjuje pomoćnika općinskog načelnika za prostorno uređenje, Elvir Omerčić, zamjenik komandira Policijske stanice Doboj Istok, Elmir Babić, direktor JKP „Čisto“ d.o.o. Doboj Istok, dr. Zijad Merdanović, ovlaštena osoba za zastupanje JZU Dom zdravlja Doboj Istok, Jusuf Mustafić, v.d. direktora JP Veterinarska stanica d.o.o. Doboj Istok, Adem Muratović, predstavnik Općinskog suda u Gračanici, Faruk Hasančević, šef Poreske ispostave Doboj Istok, te predstavnik RTV TK.

**ODSUTNI:** dr. Ferid Konjić, predsjedavajući Općinskog vijeća, Mehmed Mehinović, predsjednik kluba vijećnika SBiH i Senada Džanić, predsjednica kluba vijećnika SBB – BPS.

Sjednicu je otvorio i vodio zamjenik predsjedavajućeg Općinskog vijeća, Sajib Mešić.

Sajib Mešić, zamjenik predsjedavajući Općinskog vijeća: „ Poštovane kolege i kolegice vijećnici, načelnice sa saradnicima, prisutni gosti i prisutni predstavnici medija. Prije početka 37. sjednice Općinskog vijeća Doboj Istok molio bih vas da se Fatihom prisjetimo našeg nedavno preminulog kolege Safeta Smajilbašića, vijećnika Općinskog vijeća Doboj Istok. Neka mu je lahka bosanska zemlja. Takođe vas molim da minutom ćutnje odamo počast nedavno preminulom načelniku Općine Starše u Sloveniji, našom bratskom općinom i time mu odamo priznanje. Neka mu je slava. Predsjedavajući Općinskog vijeća i Mehmed Mehinović su najavili izostanak i molim tehničkog sekretara da nam provjeri prisutnost vijećnika. Prisutno je 13 vijećnika, a odsutna je i Senada Džanić. “

### **USVAJANJE ZAPISNIKA SA PRETHODNE SJEDNICA**

Sajib Mešić, zamjenik predsjedavajući Općinskog vijeća: „Zapisnik sa prethodne sjednice ste dobili, vidjeli i pročitali. Otvaram raspravu ako ima neko nešto vezano za zapisnik. Ako nema, ko je za zapisnik?“

Glasanje: ZA – 13, PROTIV – 0, UZDRŽANIH – 0.

### **VIJEĆNIČKA PITANJA I INICIJATIVE**

Sajib Mešić, zamjenik predsjedavajući Općinskog vijeća: „ Izvolite kolege. “

Izet Hodžić, predsjednik kluba vijećnika GDS i nezavisni vijećnik Sajib Mešić: „ Poštovani načelnice sa saradnicima, uvaženi predsjedavajući, odnosno dopredsjedavajući, kolege vijećnici i vijećnice, uvaženi gosti želim sve da vas srdačno i iskreno poselamim i pozdravim. Ja sam se javio sa jednim vijećničkim pitanjem, a postoji mogućnost da se to pretvori u vijećničku inicijativu. Očekivao sam načelnika Policijske stanice Doboj Istok, ali tu je zamjenik, pa pretpostavljam da nam može dati odgovor. Mene interesuje sljedeće: Vezano za svjetlosnu vertikalnu signalizaciju u Klokočnici ili semafor konkretno jedan problem kod izlaska i uključivanja na magistralni put iz pravca Lukavice, odnosno Frkata i iz pravca doma kulture i

*Doma zdravlja. Da li postoji mogućnost da se senzor koji je ugrađen u asfalnoj površini u saobraćajnoj i kolovoznoj traci izmjesti na mjesto koje bi služilo svrsi? Svjedoci smo da nije svrsishodno, jer se nalazi u zoni gdje motorno vozilo ne smije da bude. Imamo zaustavnu liniju na mostu, a iz pravca Lukavice je takođe prije toga i taj senzor automatski ne registruje ta motorna vozila. Ko je želio da zapazi i da vidi imamo tu malo duže zadržavanje vozila u odnosu na druge pravce, kao što je skretanje za Lukavicu, skretanje za Ahimbašiće i Babiće. Bila je dobra namjena i sve je ok dok se nisu pune linije ili zaustavne trake postavile. Da li je to nadležnost Federalne direkcije za ceste ili može nešto Policijska stanica da uradi ili Općina ili načelnik, ali uglavnom ja vidim i sam sam se uvjerio, to puno ne košta, ali onaj senzor što je sada nije funkcionalan i ne koristi svrsi. To je pitanje, ali ako bude trebalo može se pretočiti u inicijativu. Nisam siguran da li treba tu inicijativu uputiti Federalnoj direkciji za ceste. Pretpostavljam da je to njena nadležnost, ali kažem ako treba i ako ste vi saglasni sa tom inicijativom, ja inicijativu mogu dostaviti u ponedjeljak u kancelariju Općinskog vijeća i da se proslijedi Federalnoj direkciji za ceste. Hvala vam, mislim da ste me razumjeli.“*

*Hasan Hasančević, predsjednik kluba vijećnika SDA: „Uvaženi načelniče, poštovani kolege i kolegice, gosti, mediji želim iskreno da vas poselamim i pozdravim. Imam jednu vijećničku inicijativu. Shodno dopisu Srebreničkih udruženja da se u svim općinama i gradovima u Federaciji Bosne i Hercegovine da se jednoj ulici, trgu ili zgradi koja se nalazi na vidljivoj prometnici da naziv Žrtava srebreničkog genocida podnosim inicijativu da se sportskoj dvorani u Brijesnici Velikoj da naziv Sportska dvorana žrtava srebreničkog genocida. Mi smo na Kolegiju imali raspravu po tom pitanju i ako ste čitali materijale kolege iz službe su poslali mejlove šta je čije vlasništvo i nadležnost. Ja ću dati kratko obrazloženje. Ovo je inicijativa da se usvoji i da dvije nadležne službe u općini poduzmu sve mjere i radnje da u pravnom smislu riješe ovaj postupak, da usaglase sa upravnim odborom osnovne i srednje škole i sa Ministarstvom i da se traži usaglašavanje ovog naziva, kao i da se pošalje u udruženje da li i njima odgovara ovakav naziv na sportskoj dvorani. Mi bi to stavili u postupak, a da li će to biti gotovo do ovog 11. ili sljedećeg nije bitno, mjesec dva dana uopšte nije problem. Znači ispitano je sve, zvana je Federalna geodetska uprava i postoji mogućnost da se riješi na lagan način da nemamo troškova, nema unošenja u adresni registar, nema ništa i kada se objekat bude tehnički primao i uplanjivao da mu se da naziv ovakav kakav mi danas usvojimo i mi smo završili svoj dio posla. Toliko i hvala.“*

*Emira Karić, predsjednica kluba vijećnika SDP: „Pozdravljam sve prisutne. Nemam ni inicijativu, ni pitanje, ali bih se osvrnula, jer imam pravo se osvrnuti i na pitanje i na inicijativu. Zamolila bih ako bi to bila, kolega Izete, inicijativa da još u toj inicijativi nekako proširite vezano za znak stop od Doma zdravlja. Čini mi se da ovaj znak stop vrijedi samo iz Lukavice, tako da ovi koji izlaze iz pravca Doma zdravlja misle da imaju prednost. Ja kažem da ja uvijek moram pustiti ove koji ide iz pravca Doma zdravlja i da kažem da su vozači riješili ovaj problem tako što prolaze kroz crveno tako da policija mora žmiriti na to. Žao mi je što ta raskrsnica ponovo pravi problem, a mi smo najavili da će ona praviti problem, ali eto neke su se radnje kasnije desile, pa će se taj problem moći izbjeći. Što se tiče, kolega Hasko, vaše inicijative ja ću je podržati, ali opet ne mogu da ne kažem svoje mišljenje. Svoje mišljenje sam rekla i na Kolegiju i bila sam se zabrinula kada su meni šefovi službi rekli da dvorana pripada Općini. Ja sam tvrdila da dvorana pripada JU OŠ „Brijesnica“, da je od općinskog značaja, ali da ju koristi srednja škola. Međutim oni su mene uvjerali i onda sam ja otišla onako pokisnuta kući i rekla da nakon 10 godina prvi puta da nisam u pravu, ali eto jučerašnji mejl je pokazao da sam ja ponovo u pravu. Vezano za sportsku dvoranu i to mislim kolega, ne može se dvorana zvati jednim imenom, a osnovna škola drugim imenom. Podržat ću, ali neću reći kao načelnik za moju inicijativu da je nakaradna, nije, pitanja su pravilna, a nepravilni su odgovori. Svaka inicijativa je pravilna, a nepravilno je da li će ona biti realizirana ili neće. Podržat ću iako smatram da će tu biti problema, jer se naša škola zove JU OŠ „Brijesnica“ i mislim da bi i ona u sklopu dvorane trebala mijenjati, ali eto vidjet ćemo.“*

*Kemal Bratić, općinski načelnik: „Zamjeniče predsjedavajućeg, uvažene vijećnice i vijećnici, prisutni gosti selam alejk. Ja ću uzeti sebi za pravo da komentarišem inicijative, jer nisam vijećnik i ne mogu podnijeti inicijativu. Kada se radi o vašoj inicijativi mi smo već uputili zahtjev, jer evo prolazimo svi tu i znamo da ima određenih problema. Nažalost neko je prije nas izgradio sve ovo oko nas, mi smo to zatekli i sada nam valja ispravljati tuđe greške. Smatram da smo unekoliko popravili frekvenciju saobraćaja, a ko prolazi kroz crveno on će odgovarati, ako ga policija vidi vjerovatno će odgovarati. Ja nisam vidio nikoga da prolazi kroz crveno. Svjedok sam i ja, stajao sam i čekao dugo, ali mislim da je to mali tehnološki*

*problem koji se može otkloniti. Mi smo poslali zahtjev Direkciji cesta i u narednom periodu u planu smo, mada su nas poplave poremetile u zadnjih par dana, da pokušamo napraviti dvije trake na ulaz prema domu kulture. Kada se radi o ovoj drugoj inicijativi ja takođe imam svoje mišljenje i smatram da nam je udruženje građana dalo malen rok, ali mi nudimo jednu varijantu, pošto smo skoro imali proglašenje ulica i trgova i da sada ne bi mijenjali naziv neke ulice i dodatne poslove pravili. Ja smatram da je to jedan objekat kojem dolikuje taj naziv, a prije svega je lijep, u njemu se održavaju kulturne u sportske manifestacije, tako da ne vidim ništa sporno da jedan takav objekat nosi takav naziv. Neki dan sam rekao da nema ulice i trga koji zaslužuje da nosi jedan takav naziv zbog toga što su ti ljudi proživjeli i stradali u Srebrenici.*

*Izet Hodžić, predsjednik kluba vijećnika GDS i nezavisni vijećnik Sajib Mešić: „Ja sam zadovoljan odgovorom načelnika, jer imam informaciju da je to prosljeđeno. Ja sam se javio samo dvije rečenice da kažem da ne bi neko iz mog pitanja i obrazloženja izvukao pogrešan zaključak. Znači ja nisam nezadovoljan funkcionisanjem te vetrikalne signalizacije – semafora. Za mene lično to je jedna od ljepših stvari koje su se desile u ovoj godini. Sa 01.01.2020. godine uređenje te raskrnicе i vertikalne signalizacije – semafora, da ne bi neko donio pogrešan zaključak, za mene je raskrnicа ok i funkcioniše. Samo u ovom segmentu naknadno su te pune linije iz pravca Lukavice i iz pravca doma kulture postavljene tako da je taj senzor ostao na ostrvu gdje ne dolazi auto da signališe da ima tu vozilo. Ja sam zadovoljan funkcionisanjem i načinom, a iskren da budem bio sam skeptičan da će ta raskrnicа i ta signalizacija dosta lošije funkcionisati, ali vidim sa ljudima koji žive eksteritorijalno van Bosne i Hercegovine i poslovnim partnerima koji dolaze u posjetu našoj Općini da su zadovoljni. Ja ne vidim šta je sada sporno, ali dozvoljavam da svako ima svoje mišljenje i svoje razmišljanje.“*

*Emira Karić, predsjednica kluba vijećnika SDP: „Ko god podnese inicijativu ili pitanje trebalo bi da ne bude kontradiktoran. Znači podnesete pitanje i kažete da ne valja od tri kraka jedan krak i onda kažete kako ste jako zadovoljni. Onda nemojte ni podnositi, nemojte nas dovoditi ovdje u neku poziciju da imamo pravo na to mišljenje, jer ste i vi nezadovoljni, kao što sam i ja nezadovoljna. Ne može se biti i da i ne ili ste zadovoljni ili niste zadovoljni. To neko sivilo i imamo pravo da popravljamo stvari i predlagati nešto i ne možete sada reći ovo je savršenstvo samo se tu čeka jedno 6 minuta, pa ljudi izlaze na crveno. To je kontradiktorno.“*

*Sajib Mešić, zamjenik predsjedavajući Općinskog vijeća: „Uvažene kolege, ja takođe imam jednu inicijativu, a dotaći ću se i ovoga što su prethodne kolege i kolegice govorile, a djelimično je i vezano za moju inicijativu. Na molbu nekoliko građana ja sam prihvatio obavezu da iniciram jednu stvar. Na putu M4 Doboj – Tuzla u naselju Brijesnica Mala kod kuće Klokić Muhameda i Klokić Osmana postoji uključivanje sporednog puta na put M4 Doboj – Tuzla. Obzirom da je u zadnjem periodu pojačana frekvencija saobraćaja i na tom dijelu puta je iscrtna puna linija, time je onemogućeno, odnosno otežano bezbjedno skretanje na taj sporedni put iz pravca Doboja. Taj sporedni ulaz se veže za sporedni lokalni put i koristi ga više domaćinstava direktno, a lokalni put i ostali građani. Zato ja predlažem da se Federalnoj direkciji za puteve uputi dopis da se preispitaju tehničke i zakonske mogućnosti da se na tom dijelu puta iscrta isprekidana linija kako bi se obezbijedilo zakonito i bezbjedno skretanje u taj sporedni put. Dakle da oni vide mogućnosti, a nas ništa ne košta da olakšamo ovim ljudima nesmetan ulazak u svoja dvorišta. Takođe što je kolega Izet govorio, a on pravno formalno nije uputio ni inicijativu niti je u pisanoj formi dostavio i više je to bila nekakva sugestija i primjedba, a imajući u vidu šta je kolegica govorila, načelnik je sam rekao da su u toku neke aktivnosti u cilju popravljavanja funkcionisanja tog semafora. Mislim da možemo ovo što je Izet govorio kroz zapisnik da nam Omer sačini i ako nemate ništa protiv, da uz ovu moju inicijativu, ako bude prošla, uputite Federalnoj direkciji za puteve i da se doda i taj dio o čemu je govorio i kolega Izet i kolegica Emira, a načelnik je rekao da je praktično u toku rješavanje i otklanjanje tih nedostataka.“*

*Emira Karić, predsjednica kluba vijećnika SDP: „Isto tako, kolega Sajibe i zamjeniče predsjedavajućeg, kada tu inicijativu predlažete treba se osvrnuti na mnoštvo drugih problema. Znači postoji dosta, a evo u Brijesnici Maloj upravo taj isti problem i po meni ja ću biti suzdržana zašto što nije vezano za ostale probleme koji se dešavaju na punoj liniji. Da li se to odnosi i na objekte kao što je pekara gdje smo imali dva, jedan teško, a jedan smrtni slučaj. Mislim da bi se inicijativa trebala i na taj dio odnositi, pa da ja*

*onako zdušno podržim tu inicijativu, kao i na sve ostale u Doboj Istoku, ali kada je inicijativa da bar obuhvatimo mjesnu zajednicu u kompletnosti, pa da onda o tome odlučujemo.“*

*Kemal Bratić, općinski načelnik: „Ja bih sve vijećnike zamolio da prije nego što upute inicijativu da konsultuju određene vijećnike da li da upute i kako da napišu, jer očito mi imamo ovdje nekakvih tumača. Podržavam inicijativu od uvaženog vijećnika, jer je čovjek jasno rekao da je grupa građana njemu kao vijećniku, kao i bilo kome od vas kada dođe vi imate pravo da podnesete inicijativu. Kada se radi o pravnom licu, svako pravno lice je dužno da pribavi saglasnost, jer ne možemo mi za pravno lice, za bilo koje pravno lice na području općine Doboj Istok, a ima ih ovdje koji znaju da su dužni da pribave saglasnost za izlaz na magistralni put. Smiješno bi bilo da mi sada za kompletnu mjesnu zajednicu tražimo, bilo koju. Znači svaki prilazni ili pristupni put, a evo sada imamo regionalni put i svako će morati dobiti saglasnost, a pogotovo privredni subjekti i da plaćaju naknadu. Nismo mi to izmislili, takva su pravila. Ja podržavam to, jer je dobra inicijativa i koja god dođe takva inicijativa nas ništa ne košta da pošaljemo da vidimo da li postoje tehničke mogućnosti od Federalne direkcije cesta. Oni kažu da ne može, ne može i doviđenja. Nemojte zaboraviti ovo što sam u početku govorio.“*

*Emira Karić, predsjednica kluba vijećnika SDP: „U potpunosti se slažem da svaki vijećnik ima pravo pokretati inicijativu i naravno da su konsultacije moguće, jer bolje je pet ljudi, pet pametnih glava nego jedna. Takođe ću krenuti vašim stopama i tada ću tačno populistički do narednih izbora podnositi inicijative, jer ja sam podnijela, a neka Federalne ceste razmišljaju o tome da li može ili ne može, a pustit će u eter, a da li bilo pravno lice ili fizičko lice itd. Dakle, niste po meni dovoljno pripremili tu inicijativu, ali eto hvala vam od iduće sjednice dali ste mi dobrog materijala da populistički djelujem na takve inicijative.“*

*Sajib Mešić, zamjenik predsjedavajući Općinskog vijeća: „ Zahvaljujem kolegice. Imao je potrebu zamjenik komandira Policijske stanice, ali bih ga zamolio pošto će biti tačka dnevnog reda vezana, pa da ostavimo, ovo su svejedno inicijative, pa ćeš imati priliku ako si mislio vezano za ovo. Još smo na tačci vijećnička pitanja i inicijative i ako smo završili to je to. Stavljam na glasanje inicijativu kolege Hasana Hasančevića, znate o čemu se radi o nazivu sportske dvorane. Ko je za inicijativu Hasana Hasančevića?*

*Glasanje: ZA – 13, PROTIV – 0, UZDRŽANIH – 0.*

*Konstatujem da je inicijativa dobila potrebnu većinu.*

*Ko je za inicijativu Sajiba Mešića vezano za put kako ste čuli?*

*Glasanje: ZA – 12, PROTIV – 1, UZDRŽANIH – 0.*

*Konstatujem da je inicijativa dobila potrebnu većinu.*

*Obzirom da Izina inicijativa nije službeno ni podnesena, pa je možemo svesti na neku diskusiju, a iz zapisnika se može vidjeti ako je kome šta potrebno da vidi o čemu se radi.“*

## **USVAJANJE DNEVNOG REDA**

*Sajib Mešić, zamjenik predsjedavajući Općinskog vijeća: „Dnevni red ste dobili, s tim da imamo u skladu sa Statutom dopunu dnevnog reda od strane načelnika sa dvije tačke dnevnog reda. Pred samu sjednicu dobili ste o čemu se radi i prva tačka kao dopuna bila bi:*

- 1. Razmatranje prijedloga Rješenja o razrješenju predsjednika Privremenog Upravnog odbora Javne zdravstvene ustanove Dom zdravlja Doboj Istok,*
- 2. Razmatranje prijedloga Rješenja o privremenom imenovanju predsjednika Privremenog Upravnog odbora Javne zdravstvene ustanove Dom zdravlja Doboj Istok.*

*Da li neko ima nešto vezano za ovo?“*

*Emira Karić, predsjednica kluba vijećnika SDP: „Zamolit ću zamjenika predsjedavajućeg, a naravno u sklopu toga i predsjedavajućeg ukoliko je moguće da kada neko podnese ostavku da nam ipak kaže određene razloge, a da li to bilo u rečenici ili dvije ili bio roman ili kratka priča. Mislim da bi to bilo korektno. Čak mislim da kada radnik u privatnom sektoru da ostavku da mora napisati, mislim ne mora, ali to pristojnost nalaže, pa ubuduće kada ko daje te isključive ostavke da nas na neki način obavijesti.*

*Kada se vratimo retrospekcijom imali smo upravni odbor i dva su člana dala ostavku, znači predsjednik i član i opet nismo bili upoznati. Ja sam smatrala da treba ići dopuna, a vi ste ovdje mene demantovali i rekli da treba privremeni upravni odbor. Zatim izvještaj gospodina direktora nije bio prihvaćen na prošlom Vijeću, a isti takav izvještaj je jako hvaljen. Mi usvojimo privremeni upravni odbor, pa predsjednik da ostavku i mislim da nam ovo alarmantno dokazuje da se nešto događa u Domu zdravlja i da bi zaista trebali imati tematsku sjednicu sa tačkom stanje u JZU Dom zdravlja Doboj Istok, jer vidimo svašta se nešto dešava. Na kraju krajeva jako je neozbiljno na prošloj sjednici usvojili smo privremeni, usvojili predsjednika, a na ovoj sjednici evo razrješavamo ga.“*

*Sajib Mešić, zamjenik predsjedavajući Općinskog vijeća: „ Zahvaljujem kolegici. Da li još neko želi? U obrazloženju stoji da je čovjek rekao da iz ličnih razloga podnosi ostavku i to je njegova stvar. Mogao je napisati bilo šta, ali je on smatrao da je to dovoljno i mi to tako prihvatamo. Da li još neko želi? Ne želi. Ko je za dopunu dnevnog reda sa ove dvije tačke ponuđene u skladu sa Statutom od strane Općinskog načelnika?*

*Glasanje: ZA – 13, PROTIV – 0, UZDRŽANIH – 0.*

*Znači jednoglasno je usvojena dopuna dnevnog reda od strane Općinskog načelnika. Predlažem kompletan dnevni red sa dopunom. Ima li potrebe da čitamo ili da kažemo da će dopuna biti 3 i 4. tačka dnevnog reda. Ko je za kompletan dnevni red sa dopunom od strane Općinskog načelnika?*

*Glasanje: ZA – 13, PROTIV – 0, UZDRŽANIH – 0.*

*Konstatujem da je jednoglasno usvojen je sljedeći:*

#### **DNEVNI RED**

1. Razmatranje i usvajanje prijedloga Odluke o gubitku statusa javnog dobra u općoj upotrebi u Klokočnici,
2. Razmatranje i usvajanje prijedloga Odluke o dodjeli mandata novom članu Savjeta Mjesne zajednice Klokočnica,
3. Razmatranje i usvajanje prijedloga Rješenja o razrješavanju predsjednika Privremenog upravnog odbora Javne zdravstvene ustanove Dom zdravlja Doboj Istok
4. Razmatranje i usvajanje prijedloga Rješenja o imenovanju predsjednika Privremenog upravnog odbora Javne zdravstvene ustanove Dom zdravlja Doboj Istok
5. Razmatranje i usvajanje Izvještaja o radu JP Veterinarska stanica d.o.o. Doboj Istok za 2019. godinu,
6. Razmatranje i usvajanje Informacije o radu Općinskog suda u Gračanici za 2019. godinu,
7. Razmatranje i usvajanje Informacije o radu Porezne ispostave Doboj Istok za 2019. godinu,
8. Razmatranje i usvajanje Informacije o higijenskoj ispravnosti vode za piće i stanju vodoprivrednih objekata – JKP „Čisto“ d.o.o. Doboj Istok,
9. Razmatranje i usvajanje Informacije o higijenskoj ispravnosti vode za piće i stanju vodoprivrednih objekata – JZU Dom zdravlja Doboj Istok,
10. Razmatranje i usvajanje Informacije o higijenskoj ispravnosti vode za piće i stanju vodoprivrednih objekata – Mjesna zajednica Brijesnica Mala,
11. Razmatranje i usvajanje Informacije o zloupotrebi narkotičkih sredstava sa prijedlogom mjera za suzbijanje istih na području općine Doboj Istok,
12. Razmatranje zahtjeva Mehmedović Muhameda iz Brijesnice Velike za davanje saglasnosti susjeda.

#### **REALIZACIJA DNEVNOG REDA**

**Ad. 1. Razmatranje i usvajanje prijedloga Odluke o gubitku statusa javnog dobra u općoj upotrebi u Klokočnici.**

*Sajib Mešić, zamjenik predsjedavajući Općinskog vijeća: „ Otvaram raspravu. Ne vidim nikoga. Zahvaljujem. Ko je za ovu Odluku?*

*Glasanje: ZA – 13, PROTIV – 0, UZDRŽANIH – 0.*

*Konstatujem da je Odluka jednoglasno usvojena.“*

**Ad.2. Razmatranje i usvajanje prijedloga Odluke o dodjeli mandata novom članu Savjeta Mjesne zajednice Klokočnica.**

Sajib Mešić, zamjenik predsjedavajući Općinskog vijeća: „ Vidjeli ste o čemu se radi. Otvaram raspravu. Zahvaljujem. Ko je za ovu Odluku?

Glasanje: ZA – 13, PROTIV – 0, UZDRŽANIH – 0.

Konstatujem da je Odluka jednoglasno usvojena.“

**Ad.3. Razmatranje i usvajanje prijedloga Rješenja o razrješenju predsjednika Privremenog upravnog odbora Javne zdravstvene ustanove Dom zdravlja Doboj Istok.**

Sajib Mešić, zamjenik predsjedavajući Općinskog vijeća: „ Otvaram raspravu. Zahvaljujem. Ko je za ovaj prijedlog?

Glasanje: ZA – 13, PROTIV – 0, UZDRŽANIH – 0.

Konstatujem da je Rješenje dobilo jednoglasnu podršku.“

**Ad.4. Razmatranje i usvajanje prijedloga Rješenja o imenovanju predsjednika Privremenog upravnog odbora Javne zdravstvene ustanove Dom zdravlja Doboj Istok.**

Sajib Mešić, zamjenik predsjedavajući Općinskog vijeća: „ Otvaram raspravu. Zahvaljujem. Ko je za ovo Rješenje?

Glasanje: ZA – 13, PROTIV – 0, UZDRŽANIH – 0.

Konstatujem da je Rješenje dobilo jednoglasnu podršku.“

**Ad.5. Razmatranje i usvajanje Izvještaja o radu JP Veterinarska stanica d.o.o. Doboj Istok za 2019. godinu.**

Sajib Mešić, zamjenik predsjedavajući Općinskog vijeća: „ Otvaram raspravu.“

Emira Karić, predsjednica kluba vijećnika SDP: „Direktore, da nema ovog bruto bilansa, ovaj izvještaj bi bio jedna strana, odnosno dvije strane. Vi ste prije dvije godine imali jedan zaista sadržajan izvještaj u kojem sam ja branšu koju dovoljno ne poznajem zdušno čitala i upoznavala neke stvari. Opet ste se odlučili na onu, hajmo reći, prvu verziju, a meni nije jasno zbog čega, jer sam vidjela da znate kakav je to pravilni urnek jednog izvještaja. Naravno moram reći sljedeće da bez obzira šta i ko komentarisao, a mislim da neće ni komentarisati. Meni se direktore vaša frizura ima pravo privatno ne svidjeti ili vaše ime, ali se nema pravo to upetljivati u neko mišljenje o radu Veterinarske stanice. Valjda ste me dovoljno razumjeli. Kada je u pitanju rad ja se osvrćem na to je li bilo žalbi građana, a znam 100 % da nije bilo, jer nije došlo ni na Vijeće, a nisam čula ni u nekim mjesnim zajednicama itd. Takođe niste ovdje naveli, a što je jako pohvalno, to da cijena od 2006. godine nije više povećavana. Od 2006. godine je povećavana za iznos PDV, dok druge ustanove, a mogu i imenovati naš vrtić koji je od 2006. godine 3 – 4 puta povećavao cijenu. Tako da pružanjem dobre usluge uz cijenu koja se ne mijenja 14 godina, onda se i ne ljutim na ovako štur izvještaj. Opet vi imate pravo objasniti zbog čega ste tako odlučili.“

Hasan Hasančević, predsjednik kluba vijećnika SDA: „Pošto je izvještaj ovakav kako je rekla kolegica Emira i složio bih se sa njom, a ovdje stoji da je gubitak koliki jest klub vijećnika SDA predlaže da se ne usvoji ovaj izvještaj sa zaključkom, pošto je tamo vršilac dužnosti direktora u dva navrata, da se u skladu sa zakonskim propisima u roku od 15 dana raspiše novi konkurs o imenovanju direktora.“

Sajib Mešić, zamjenik predsjedavajući Općinskog vijeća: „ Zahvaljujem kolega. Da li još neko želi? Pošto se niko ne javlja, izvolite direktore.“

Jusuf Mustafić, v.d. direktora JP Veterinarska stanica Doboj Istok: „ Pozdravio bih vas sve i jako mi je žao što nema ovdje predsjedavajućeg, pa mnoge stvari koje sam mislio reći neću, jer nije pristojno kada nema tu čovjeka. Razlog zašto je štur izvještaj vi vjerovatno svi znate. Prvo to je moje interno pravo, jer sam tražio baš za ovom govornicom da se napravi neki urnek šta treba popunjavati i koji su to uslovi da bi se usvojio neki izvještaj ili neusvojio, koje su posljedice ako se ne usvoji itd. Niste poslušali, jer ja ne

vidim taj urnek šta bi trebalo da sadrži. Međutim pored svega toga najveći razlog je to i ako se sjećate od tada sam zaključio da je napametnije da šutim, jer svaka rasprava ne vodi ničemu, sve što kažem jednostavno nastoji da se pljuje. Posljednji izvještaj koji sam poslao, a imam zapisnik sa sjednice. Ja ću se osvrnuti na karakteristično gdje je u pitanju predsjedavajući, izjave načelnika i ponašanje, odnosno ne ponašanje Omera Hadžića kao pravnik koji prisustvuje tome. Ferid Konjić kaže citiram: Ja znam, jer on je meni davno rekao i meni lično poručio dok sam ja predsjedavajući Općinskog vijeća, on neće dolaziti. Ovaj izvještaj je usvajan 2017. godine za 2016. godinu i ja sam prisustvovao 2015. godine. Prvi puta ove godine, kunem se Alahom, da sa tim čovjekom nisam progovorio ni jedne riječi za tu godinu, osim na dan izbora kada smo banuli jedan pred drugog u džamiji i morali smo se salamiti i to arapskom jeziku. Čemu ta laž ako se želi saradnja. Načelnik kaže: Ja ovdje odgovorno tvrdim da naša Veterinarska stanica nema tačne podatke. Zašto nema? Nema saradnje sa našim farmerima na terenu. To vam odgovorno ovdje tvrdim i donijet ću vam podatke na narednoj sjednici gdje ćete vidjeti da je porast broja grla, ne pad, nego porast iz ovog ili onog razloga. Da li ste ikada dobili te podatke? Ljudi, ako ja ovdje sada kažem da mi ne izvozimo radnu snagu u Njemačku, nego Njemačka radna snaga dolazi raditi u Bosnu. Ko ovdje želi sa mnom o tome pričati? Traži se od mene da ne vjerujem svojim očima, a znam napamet, pitajte me za bilo koju kuću ko ima kravu i koliko ima krava i teladi u toj štali. To je nevjerovatno. Koji je meni interes da pišem da je pad stočarstva 8%? Ne znam zašto. Kada ste trebali usvajati ovaj izvještaj ili ne usvajati postavio sam Omeru kao pravniku prije Vijeća da mi odgovori na neka pitanja ili nije znao ili nije htio. Ovdje kaže: Imamo prijedlog i ko je za prijedlog da se ne usvoji izvještaj zbog nepotpisivanja predsjednika nadzornog odbora.“

Sajib Mešić, zamjenik predsjedavajući Općinskog vijeća: „Direktore, da se vratite na Izvještaj za 2019. godinu, jer preširoko je otišlo.“

Jusuf Mustafić, v.d. direktora JP Veterinarska stanica Doboj Istok: „Kažem da ovo što ste donijeli je apsolutno nezakonito. Omer neka objasni, a ja ću eto prestati raditi u veterini. Šta bi bilo da je ovo izazvalo neke posljedice pa da smo završili na sudu, a navjerovatnije ćemo preći na sudski teren. Ja se neću tamo samo braniti, vjerujte. Što se tiče ovoga, jednu stvar vas molim raspišite konkurs, izaberite koga god hoćete, ali nemojte uništavati stanicu. To vas molim. Ja ću biti najsretniji da ja radim tamo, a imam još 8 godina do penzije, ali da ne dolazi do smanjenja plate. Nemojte misliti da će me istjerati bilo ko da dođe za direktora iz one zgrade koja je moja i Hasina. Nemate predstavu o meni, ne želite sa mnom da razgovarate, a nemate zaista predstavu. U subotu je predsjedavajući pokušao, pa nije uspio, pa je na moj nagovor u utorak održao sastanak sa mojim radnim kolegom o nagovoru da se kandiduje za direktora. Smiješno je to. Ja sam sa njim u januaru razgovarao o tome da preuzme. Ja ga molim, evo pozivam, ne vidim drugu opciju, ja pozivam načelnika i predsjedavajućeg da ubijede njega. Vjerujte momak ne smije, izvinite načelniče, ali najviše ovdje zbog vas. On je prisustvovao ovoj sjednici i rekao da neće nikada više.“

Kemal Bratić, općinski načelnik: „Ja sam mislio da će direktor da se osvrne na izvještaj o radu za prethodnu godinu. Drago mi je što ste ovdje govorili, ako je to iskreno, da nećete da pričate o nekome koga ovdje nema. Znam da svaki dan dok idete na teren pričate o svima počev od mene i predsjedavajućeg do kompletnog vijeća. Ja ću vam dovesti ljude, a dovest ću vam i vaše radnike. Direktore, ja sam vas pažljivo slušao. Ako taj momak ne smije zbog mene da bude direktor, direktore, ja tvrdim da ne smije zbog tebe, a sjest ćemo i razgovarati i sa njim i sa tobom i sa predsjedavajućim. Ono što si ti radio tamo sve ove prethodne godine ne uvažavajući ovu instituciju koja je osnivač, ne dolazeći na vijeća na izvještaje, šaljući dopis da ideš na odmor itd. sam si to sebi napravio direktore, nisam ja. Ja pružao ruku saradnje, pa predsjedavajući i svaki moj pomoćnik, sve sam ih izmijenjao da bi sa tobom sarađivali. Kada imamo uginuće neke stoke moramo da te molimo da uradiš svoj posao. Ja ti govorim argumentovano. Znaš li koliko si godina direktor? 17 godina si direktor.“

Izet Hodžić, predsjednik kluba vijećnika GDS i nezavisni vijećnik Sajib Mešić: „ Mislim da nema potrebe za takvom retorikom. Ja želim sam sa sobom da otklonim jednu nedoumicu, jer gledajući i čitajući izvještaj meni je zapelo i želim da mi se objasni u bruto bilansu ovdje stoji građevinski objekat 63.496 KM. Interesuje me šta je to, jer ja imam pravo kao vijećnik da znam. Znam otprilike da je ona zgrada gdje se nalazi javno preduzeće Veterinarska stanica u privatnom vlasništvu i da je opod kirijom. Sada se mogu dvoumiti da li je ono u Babićima vlasništvo Veterinarske stanice i mene interesuje koji je to objekat, jer

*piše građevinski objekat. Ne želim da iko razmahuje, jer imam pravo predstavnik sam naroda i imam pravo da pitam i molim korektan odgovor.“*

*Emira Karić, predsjednica kluba vijećnika SDP: „Kada ste oborili izvještaj Doma zdravlja jedini razlog koji sam čula je bilo od predsjedavajućeg da vrsta specijalizacija nije u redu, odnosno da nema specijalizanata porodične medicine. Znači zbog toga se prošli puta oborio izvještaj. Sada se obara zbog bilansa koji je jedne godine u plusu, jedne u minusu i smatram da je to nešto stavljanje ispod tepiha. Lijepo bi bilo kao što i ja svima vama govorim jasnim konkretnim rečenicama da kažete isto tako da se ne radi o tome, da se radi o jednoj drugoj stvari. Neću sada direktno navesti o kojoj nego ću ovako kroz poruku gospodinu direktoru i svim ostalim direktorima i menadžerima, nikada nemojte podlijegati politici, bio SDP, bio SDA, bila Stranka za BiH itd. jer jedino tako možete čisti na onaj svijet. Nemojte, previše je ovo prljava stvar, niste ovdje dobro došli zato što niste podobni, da se razumijemo. Jednostavno od kako je rat nastao pa nadalje ovdje u našoj Bosni i Hercegovini samo moraju biti podobni. Ja sam baš juče rekla svojim kolegama kamo sreće da nas ne natjeraju da četvoronoške hodamo cestom, da ne smijemo ustati i da ližemo tu cestu. Tada bi bilo super stanje i tada bi nam rekli ko smo i šta smo i dokle smo došli. Nemojte molim vas ili se vratite kao i direktor Doma zdravlja na svoje radno mjesto koje vam pripada, nemojte podlijegati, radite svoj posao kako najbolje znate. Ja kažem da sam fascinirana da niste promijenili cijenu i to mi je dovoljan razlog, a ne nešto tamo plus minus. Jednostavno niste htjeli obilaziti teren, govoriti kako je ova vlast savršena, a sada ste rekli kako vaš radnik zbog jednog krutog, stava koji ja ovdje izlažem već osmu godinu, gospodina načelnika. Ja zaista nemam ništa protiv njega nego samo stava kao gospodina načelnika. Gospodin načelnik nema te fleksibilnosti da saraduje sa bilo kim, da li sa mjesnim zajednicama, da li sa privrednicima itd. i mi smo ovdje potop. Gračanica je dobra i Doboj Jug je dobar, a ovo ne valja. Ali eto dragi građani idemo dalje, idemo u novi potop u nove poplave itd.“*

*Kemal Bratić, općinski načelnik: „Ja bih zamolio, jer se ovdje ne priča o izvještaju o radu Općinskog načelnika i da malo vodimo računa o tome. Znači ja sam izašao jer sam prozvan sa ove govornice. Ovdje se očito vidi da ste vi zajedno pisali izvještaj, jer kažete da znate sve tamo podatke. Htio sam da kažem da je možda takav stav u nekim drugim strankama da moraš biti podoban, u SDA to nije tako. Mi smo ovdje 8 godina, jesmo li pravili smetnje Veterinarskoj stanici? Nismo nikada. Tolerisali. Molim vas direktore, zato vi imate problem sami sa sobom, jer ne uvažavate nikoga. Rekli ste načelniku da je iritantan i mislite da ćete vi pričati, a mi ostali da ćemo šutiti, uvažena vijećnice. Ja vas molim zamjeniče.“*

*Sajib Mešić, zamjenik predsjedavajući Općinskog vijeća: „Kolegice, prekinut ćemo i pauzu ćemo uzeti da se smirite. Nema potrebe kolegice, dobit ćete priliku, jer svi dobivaju priliku. Nisam htio namjerno da rušim dosadašnji način, jer je predsjedavajući dopuštao, po mom ličnom mišljenju možda se i previše narušava Poslovnik i ja sam htio da nastavimo tim tempom i tim načinom, ali ako budemo ovako nastavili morat ćemo se strogo pridržavati Poslovnika.“*

*Kemal Bratić, općinski načelnik: „Ja sam izašao da pričam o izvještaju i ja kao čovjek imam pravo da budem za ili protiv iz nekog razloga. Ako je Hasan Hasančević, kao predsjednik kluba SDA, rekao da je on protiv, odnosno da je klub protiv, nemojte da pravimo dramu od toga. Ako je neko za, dajte argumente da nas ubijedite da budemo i mi za. Cijena nije mijenjana zato što ima konkurencija. Od skora su počeli da izdaju fiskalne račune, sve ćemo otvoriti. Vi znate da nisu izdavani fiskalni računi u Veterinarskoj stanici, a znate i kada su uvedeni i time ćemo se pozabaviti u narednom periodu. Nemojte braniti nešto što nije dobro. Mene što se tiče neka bude milion godina direktor, neka radi kako treba i neka uvažava ovu ustanovu koja je to osnovala. Znači šta ima općina tamo imovine? Samo dvije kantice ima. Zašto? Direktor se nije trudio da obezbijedi to da imamo kao vlasnici, da ne govorim o drugim stvarima, a pričat ćemo o svemu tome.“*

*Jusuf Muatafić, v.d.direktor JP Veterinarska sjednica d.o.o. Doboj Istok, je napustio sjednicu.*

*Hasan Hasančević, predsjednik kluba vijećnika SDA: „Molio bih kolege i kolegice kada izađu da pričaju o dnevnom redu, ako budemo pričali o potopima i podobnim i nepodobnim otići ćemo daleko. Da ne stoje te vaše tvrdnje dotični gospodin je, evo izašao je, 17 godina direktor i SDA je pustila da bude direktor. Direktor srednje škole, rahmetli, takođe u dva tri mandata nije bio član SDA, pa direktor osnovne škole u Klokočnici Omer Hasančević takođe nije bio član SDA. Kažete alarmantno stanje u Domu*



*zdravlja prije pet minuta za govornicom, a nije vam alarmantno u Veterinarskoj stanici. Budite principijelni i dosljedni kada pričate o određenim institucijama, isti aršin za sve. Nemojte ad hok, Jusuf vam se sviđa, ovaj vam se ne sviđa. Očito kako se približavaju izbori neko postaje nervozan. Očito vam glas javnosti ne ide u prilog, ali o tom potom, vidjet ćemo ako Bog da.“*

*Emira Karić, predsjednica kluba vijećnika SDP: „Ne mogu se dražati dnevnog reda, jer su neke stvari rečene. Hoćete li vi, načelnice, da ja sada ovdje iznosim šta je meni bivši direktor Doma zdravlja rekao poslije sjednice kroz otvoren razgovor o saradnji. Nema potrebe za govornicom, jer nešto smo privatno pričali ili kada se ja vama obratim za neku pomoć, nije u redu da ja sada nemam pravo govora ovdje. Znači ja ću se vama i dalje obraćati za pomoć. Pomoć nije vezana za Emiru Karić, nije za Selmu Karić, nije za Ibrahima Karića, pomoć je bila za područnu školu. Kažete držite se dnevnog reda kada vama odgovara, a u pola Čista govorite kako je moj amandman nakaradan i kolege iz opozicije govore hajde napusti nije u redu da progutaš to da ti je amandman nakaradan. To je nepoštovanje. Isto tako spominjati građanski rat, mene je na Kolegiju Hasko ponovo iziritirao gdje sam ga htjela pitati a šta je to bilo u Srebrenici. On drži predavanje nama koji želimo da što bolji naziv usmjerimo, on nama drži predavanje šta je bilo u Srebrenici. On je mene izbacio iz kolosijeka pa sam htjela da ga pitam šta je to bilo i onda vi meni kao ne zna Emira šta je bilo Srebrenici. Zato pustite se tih stvari ja imam priče za 100 godina, tako da sa tim nemam problem. Mislim da imam pravilnu intelektualnu priču tako da mi nije problem da ide u eter. Nije lijepo ovako nekoga iziritirati, to hoću da kažem, malo nas je previše ovdje iritantnih. Na kraju neću reći više ništa, jer dobro je uvijek pobijedilo zlo.“*

*Kemal Bratić, općinski načelnik: „Neki su u sazivu Vijeća 8 godina, a neki su 4. Ono što sam uvijek govorio i što ću uvijek govoriti i što ću uvijek raditi, onaj ko bude poštovao, ne mene kao Kemala Bratića, nego kao načelnika, jer meni su građani dali povjerenje, kao i ovo Vijeće, imat će kod mene uvijek otvorena vrata i dobru saradnju. Onaj ko bude omalovažavao i nepoštivao neće nikada. Ja mogu biti još više iritantan nego što neki kažu da sam iritantan. Naravno da ću biti iritantan. Ako hoćemo saradnju moramo se međusobno uvažavati, a ne da bude samo u jednom pravcu, bez obzira ko to bio. Ovdje se radi o radu Veterinarske stanice, ne radi se o načelniku. Ja znam ja sam nekim partijama cilj i oni će dati sve od sebe da dođu do tog cilja. Nažalost, odnosno na svu sreću oni se ne pitaju. Pita se onaj gore i on određuje kada će i šta biti. Znači direktor je bio 17 godina i nije bio podoban. Nismo mu se uopšte miješali u rad. Dovedite ga i pitajte jesam li mu ikada rekao de direktore to uradi, osim kada me komunalni redar nazove i kaže načelnice, on neće da ide gore da to uradi. Zato sam ga samo zvao. Je li ja trebam direktora zvati ako je krava nekome uginula da on radi svoj posao? Ne trebam naravno. Je li trebam Elvira zvati ako je neko napravio prekršaj, a Elvir je plaćen za to ili Sud ili Faruka. Dajte ljudi o čemu pričamo. Ako neko misli braniti takve ljude, ja ih neću braniti. Na kraju krajeva svjedoci ste svi ovdje neuvažavanja i nepoštovanja vlasti prije svega.“*

*Sajib Mešić, zamjenik predsjedavajući Općinskog vijeća: „Zahvaljujem. Konstatujem da je kolegunica Emira Karić samovoljno napustila sjednicu.“*

*Kemal Skopljak, vijećnik BPS: „Pošto prvi puta izlazim želim da pozdravim i poselamim sve prisutne. O ovom izvještaju o radu Veterinarske stanice ja nisam čuo ni jedan normalan komentar, niko ga nije prokomentarisao kao izvještaj za prethodnu godinu. Znači sve se svelo na lične stvari, prepucavanja lična što je nedopustivo ovdje u ovom Vijeću da se radi. Ako neko nekoga ne trpi, neka te stvari raspravljaju mimo ovog Vijeća i neka rješavaju mimo Vijeća. Mi smo ovdje da riješimo da li je neko radio ili nije radio. Ako je radio dobro da ga podržimo, ako nije radio dobro da ga osudimo i da ne podržimo taj izvještaj. Pod broj 1. to sam htio da prokomentarišem, a pod broj 2. za predsjedavajućeg ne možete vi govoriti da je nekome dobro i bolje da šuti.“*

*Sajib Mešić, zamjenik predsjedavajući Općinskog vijeća: „Ako se to odnosi nešto vezano za mene, nisam te baš shvatio. Imate vi pravo da kažete bilo šta, ali ovo što ste govorili to vam apsolutno ne stoji, bar po mom mišljenju. Kolega, predsjednik kluba vijećnika SDA, je u prvom nastupu bio jasan i precizan zbog čega predlaže da se izvještaj ne usvoji i to uopšte nije ličilo na neki lični odnos.“*

*Hasan Hasančević, predsjednik kluba vijećnika SDA: „Ako ste me dobro slušali ja sam kazao zbog gubitka koji je prikazan u izvještaju. Ja inače u životu gubitake slabo podržavam, tako i u javnim*

ustanovama. Što se tiče privatno čak mi je simpatičan i okrenuo sam se kada mu je koleginica Emira spomenula frizuru, stvarno mu je lijepa frizura. Fin mi je onako dječaćić.“

*Izet Hodžić, predsjednik kluba vijećnika GDS i nezavisni vijećnik Sajib Mešić: „Pokušavam ostati normalan. Uvaženi kolega Kemale, ne možete reći niko, jer ja sam čitao izvještaj i što se tiče izvještaja konkretno sam postavio pitanje. Prema tome nije u redu da tako pričate, bar ja mislim da nije u redu. Znači iz izvještaja ja sam postavio direktno pitanje jasno, glasno i korektno.“*

*Semir Halilović, vijećnik SDA: „Kao što neko reče svako ima pravo na svoje mišljenje i da bude i za i protiv ovog izvještaja i da bude suzdržan. Nije korektno da se prekida sjednica, da se stalno dobacuje upravo zbog činjenice da Sajib koji trenutno predsjedava, a tako i doktor Ferid Konjić kada predsjedava, dopušta beskonačno mnogo puta da izađete i šta je problem da se izađe za govornicu i da se to kaže. Po meni nije lijepo da se određuje intelektualni nivo vijećnika, a pogotovo da za sebe kažete kako vam je intelektualni nivo malo bolji od ostalih. Poruka za one koji određuju intelektualni nivo da i mi čitamo knjige, ali ima jedan političar u Srbiji koji određuje set literature svojim kolegama šta će da pročitaju. Na njegovu žalost taj političar je osuđen za ratne zločine. Ja pročitam neku knjigu, ali neće mi niko literaturu preporučivati, a intelektualni nivo je time određen. Nekada sam morao čitati tu literaturu koja je imala na sebi petokrake, imao sam na neki način presing – pritisak, sada biram svoju literaturu i određujem sam svoj intelektualni nivo, ali nemojte da vagamo čiji je taj nivo veći.“*

*Selmin Karić, vijećnik SDA: „Uvaženi zamjenice predsjedavajućeg, kolege i kolegice vijećnici, uvaženi gosti, predstavnici medija selam alejkum i dobar dan. Meni je žao što je direktor napustio sjednicu, mene stvarno interesuje, jer ovdje u zaključku Nadzornog odbora kaže da oni usvajaju izvještaj sa negativnim poslovanjem jer je evidentan pad stočarstva na našoj općini sa tendencijom daljeg pada, kao i nemogućnosti ostvarivanja podsticaja za animalnu proizvodnju zbog složenih procedura, kašnjenja u načinu isplaćivanja istih. Ja mislim da ovo uopšte ne stoji. Mene baš interesuje odakle su direktoru ovi podaci vezano za pad stočarstva, možda je njihov obim usluga smanjen, a to je nešto drugo. To nema veze sa padom stočarstva, odnosno da li je pad ili nije. Ako je obim usluga smanjen, to je nešto drugo. Mene interesuje odakle su podaci, jer ja koliko znam čak je i u blagom porastu stočni fond. Drugo, kada su u pitanju podsticaji ja koliko znam da podsticaji za animalnu proizvodnju idu bez problema. Koliko ja znam obzirom da ima doticaja sa ovom branšom idu bez problema. Naravno vi imate tako određenu dokumentaciju koju treba da obezbijedite, ali mislim da uopšte ovo ne stoji, ali direktor nije tu da bi nam dao pojašnjenje vezano za to.“*

*Sajib Mešić, zamjenik predsjedavajući Općinskog vijeća: „Zahvaljujem kolega. Da li još neko želi? Ako ne stavljam na glasanje Izvještaj o radu Veterinarske stanice sa zaključkom koji je predložio kolega Hasana Hasančević. Ko je za ovaj izvještaj?*

*Glasanje: ZA – 0, PROTIV – 9, UZDRŽANIH – 3.*

*Konstatujem da izvještaj nije dobio potrebnu većinu i apelujem na Nadzorni odbor da što prije izvrši zaključak koji smo predložili.“*

#### **Ad.6. Razmatranje i usvajanje Informacije o radu Općinskog suda u Gračanici za 2019. godinu,**

*Sajib Mešić, zamjenik predsjedavajući Općinskog vijeća: „Predstavnik Općinskog suda je prisutan, otvaram raspravu.“*

*Hasan Hasančević, predsjednik kluba vijećnika SDA: „Ja imam obavezu prema Općinskom sudu i prema sebi da pohvalim rad Općinskog suda i saradnju sa svim organima općine Dobož Istok od prijema dokumentacije, saradnje, izdavanja dokumenata, traženja raznih informacija, sve je besprijekorno. Zahvaljujem.“*

*Selmin Karić, vijećnik SDA: „Vidjeli smo kada je u pitanju Općinski sud u Gračanici kao što se vidi oni dosta dobro rade svoj posao, da je broj predmeta dosta smanjen na protekli period i da je riješena većina predmeta koja je zaostala. Ono što bih naročito htio pohvaliti je ZK ured ovog Suda, jer sam i ja često tamo i koristim usluge tog ureda da su izuzetno uslužni, usluga je stvarno korektna i brza i vi ZK izvadak možete odmah dobiti u roku od 2 -3 minute ako ste onu taksu od 10 KM po ulošku uplatili i u*

roku od 2 – 3 minute dobijete ZK izvadak. Kada su u pitanju uknjižbe ugovora vjerujte da to ide izuzetno brzo naročito kada su u pitanju pravna lica i ja im se u to ime zahvaljujem i nadam se da će nastaviti ovako i u budućnosti.“

*Kemal Skopljak, vijećnik BPS: „Da ne ispadne da samo pozicija hvali rad Općinskog suda u Gračanici. Ispred opozicije ja ću reći takođe slažem se sa vijećnikom Selminom, Općinski sud u Gračanici je pokazao i dokazao da rade posao kako treba. Ja im se zahvaljujem i nemam šta drugo da dodam.“*

*Sajib Mešić, zamjenik predsjedavajući Općinskog vijeća: „Zahvaljujem kolega. Ima li potrebe predstavnik Suda da se obrati? Zahvaljujem. Ko je za ovu Informaciju?*

*Glasanje: ZA – 13, PROTIV – 0, UZDRŽANIH – 0.*

*Konstatujem da je jednoglasno informacija usvojena i zahvaljujemo se predstavniku na prisustvu.“*

#### **Ad.7. Razmatranje i usvajanje Informacije o radu Porezne ispostave Doboj Istok za 2019. godinu,**

*Sajib Mešić, zamjenik predsjedavajući Općinskog vijeća: „ Šef Porezne ispostave je takođe prisutan. Otvaram raspravu.“*

*Fajik Muratović, vijećnik SDP: „Lijep pozdrav svima. Mislim da mi predsjedavajući neće zamjeriti, ali malo je falilo da napustim ovo Vijeće. Nema potrebe da dižemo masnoće, šećere i sve ostalo jedni drugima. Ljudi, ovo se meni ne sviđa i ubuduće ću svako Vijeće napustiti kada dođe do rasprave. Kada god je žešća rasprava akteri koji su to izazvali napustili su ovo i ostavili nas same ovdje. Što se tiče ovog izvještaja Porezne ispostave neću ništa vezano za izvještaj, hoću samo da vam objasnim i da se zahvalim našem Faruku zbog toga što mi privrednici, pogotovo sitni, imamo u svakom momentu kod njega sugestije, prijedloge, savjetovanja, jer nama bi bio daleko daleko otežan rad. To uopšte nije dio njihovog posla, ali ja znam da mi potrošimo i 2 – 3 sata u toj službi da nam razjasni sve nove poreze, izmjene zakona i svega ostalog. Izašao sam samo da im se zahvalim i to od mene traže obrtnici da izađem i kažem da je veliko hvala od njih svih koje usmjerava da ne bi stradali kasnije sa kaznama.“*

*Selmin Karić, vijećnik SDA: „ Kao što kolega Fajko reče o izvještaju se stvarno nema šta puno reći. Izvještaj je kao i do sada odlično urađen i Faruk nas više ne može iznenaditi kada su u pitanju ovi izvještaji. Ima stvarno puno podataka i podaci se mogu iskoristiti vezano za izradu Strategije razvoja općine Doboj Istok za period 2021 – 2027. Ono što nam je bitno i što nam je Faruk predočio u ovom izvještaju su nekakvi uporedni podaci da ne kažem sa današnjim danom. To su izuzetno dobri podaci i vezano za ovo stanje prirodne nesreće da se ipak bar u dosadašnjem periodu nije toliko osjetilo na području naše općine. Da li će se to odraziti u narednom periodu, vidjet ćemo. Ono što sam ja htio je da pohvalim, a to je baš ovaj period koji nije vezan za izvještaj, a vjerovatno će se to zaboraviti do naredne godine, ovo stanje prirodne nesreće gdje je kao i u svim institucijama i Poreznoj upravi je naloženo da svu komunikaciju sa obveznicima vrši putem telefona, odnosno fax-a i mejla. Mnoge stvari se ne mogu tako odraditi i Faruk je uložio maksimalan napor da se uradi jedan prijemni pult gdje obveznici mogu imati direktan kontakt sa Poreznom upravom uz primjenu mjera koje su naložili federalni, kantonalni i općinski krizni štab. Ja mu se u to ime zahvaljujem i mogu slobodno reći i u ime svih obveznika.“*

*Semir Halilović, vijećnik SDA: „ Neko je pitao kako se pravi izvještaj, pa ako ne znaju kako se pravi izvještaj mogu otići na edukaciju u Poresku upravu i ja vjerujem da će objasniti i pokazati, jer ovo je dobar urnek za pravljenje izvještaja svih vrsta.“*

*Izet Hodžić, predsjednik kluba vijećnika GDS i nezavisni vijećnik Sajib Mešić: „Dokaz da se oko dobrih i lijepih stvari može složiti i opozicija i pozicija je primjer rad i izvještaj, a prije svega rad, pa izvještaj Porezne ispostave Doboj Istok. Ja jednostavno rijetko kada hvalim izvještaje bilo koje institucije ili bilo kojeg preduzeća ili javne ustanove, jer imam razloge za to. Ovaj put bih se složio sa kolegom Fajkom sa onim što je rekao u svom izlaganju. Znači dobro je da tu instituciju imamo, dobro je što imamo te ljude u toj instituciji koji u svakom momentu znaju kako treba na krajnje profesionalan način odgovoriti zahtjevima građana, a pogotovo privrednih subjekata na području općine Doboj Istok. Prije svega ja im se zahvaljujem na tome i čestitam, jer to troje uposlenika Porezne ispostave Doboj Istok stavljaju sebe i sve svoje kapacitete i baš su primjer kako bi ostale institucije, ustanove i preduzeća trebale funkcionisati. Ja*

*nisam pored nekakvih zlih jezika, a pogotovo od privrednika loše komentare i loše priče čuo i kažem neprocjenjivo je i ne znamo cijeniti šta imamo. Vjerovatno kada bi otišli u neke druge općine da vidimo kako funkcionišu takve i slične ustanove, odnosno porezne ispostave onda bi se uvjerali. Znači još jedanput Faruku šefu Porezne ispostave i njegovim kolegama čestitam i zahvaljujem što su tu i kažem svaka čast.“*

*Hasan Hasančević, predsjednik kluba vijećnika SDA: „Kada su Faruk kao šef i uposlenice bili na godišnjem određen broj privrednika je imao priliku da vidi kako je raditi kada je neko drugi. Na svu sreću, pa se desi nesreća, pa u toj nesreći ima neki hajr, pa se počne cijeniti, ovo što je kolega Izet govorio, ono što se ima. To se desilo u radu Porezne ispostave u stanju COVID-a. Lijepo bi bilo, kao što reče kolega Fajik, ako je nešto čestito, lijepo i kako treba da i pohvalimo. Ja neću hvaliti pošto je moja saradnja sa njim non stop, kancelarija je do kancelarije. Izvještaj kao izvještaj takav je kakav je, dobar i mi smo naučili na to. Htio sam da potenciram zašto su oni takvi i zašto bi mi koji smo uposleni u nekim organima uprave i u javnim ustanovama trebali da imamo pristup sa našim građanima i da to bude na nekoj osnovi kao familija, što treba završi i idi, što mi treba uradi i idi. To su te stvari da nam nema nikakvih problema. Nažalost kod nas se sve dovede i do političke konotacije. Znači čestitke kolegicama i Faruku.“*

*Kemal Skopljak, vijećnik BPS: „Dragi Faruk tebe nahvališe i ja više nemam šta reći i mogu se samo složiti sa prethodnim diskutantima i reći tvoj izvještaj uvijek zna se kakav je kao izvještaj. Međutim ja želim reći jednu drugu stvar. Najvažnija stvar jeste rad i posao koji vi napravite, sam prijem stranaka, obrada podataka tako brzo i tako efikasno može se raditi samo uz jedno dobro šefovanje i maksimalno iskorištavanje resursa sa kojima raspolazete. Znači tih par radnika treba znati rasporediti kako treba i treba ih uposliti da rade. Prema tome nemam šta drugo da kažem.“*

*Kemal Bratić, općinski načelnik: „Faruk, nije dobro kada te puno hvale. Šalim se. Znači, na saradnju gospodina Hasančevića kao šefa Poslovnice i mene kao načelnika nemam primjedbe i želim to javno da kažem. Ono na što ću se ja osvrnuti jesu podaci koje su oni pripremili i to je za mene najbitnija stvar. Naravno čovjek je takav kakav je i ja bih rekao da bi po njemu mogli praviti urnek kako treba da izgleda neki javni službenik, a govorim za Faruka za njegov pristup, za njegovu komunikaciju. Nisu sve stranke zadovoljne, nemojte misliti da je njima lahko, jer naravno da nije. Pokazatelji ovdje govore da na području općine Doboj Istok nije potop kao što neki govore. U Doboj Istoku je dobro stanje, a dobro stanje je bilo i za vrijeme pandemije. U našim usmenim komunikacijama 50 – 60 ljudi, a ja sam to rekao i u izjavi za televiziju, čak i neopravdano dobilo otkaz, pa su poslije primljeni, pa hoće li biti nekog podsticaja ili neće. Kada uporedimo 01.01.2019. godine 2402 uposlena po mjestu prebivališta, 31.12.2019. godine 2516, a 12.06. 2442 i to je ona razlika od 60 – tak ljudi koje smo pominjali i to je super stvar da naša privreda nije toliko osjetila. Naravno ima onih kojima je promet pao više od 20% i oni će imati pravo naknade od kantonalnog, odnosno od federalnog nivoa. Ovo su pokazatelji koje sve nas treba da interesuju i svi treba da jašemo na ovome. Neko kaže da klima ovdje nije dobra, a ja tvrdim obratno. Klima je super, jer ljudi rade, zapošljavaju i šire svoj biznis. Mi trenutno imamo 3 – 4 velike hale koje će biti proizvodni pogon ili neki trgovinski ne znam i nećemo da ulazimo u detalje to je stvar naših privrednika i mi treba samo da im damo podršku. Ono što je bitno, ja znam, a nadam se da mi Faruk neće zamjeriti, da nekada nemaju podršku od svojih institucija onoliko koliko bi trebali, čak ni u ljudskom resursu, jer bi po sistematizaciji trebali imati više, a da ne govorimo o materijalnom, ali oni se snalaze na sve moguće načine, bitno je da posao ne trpi. Želim da nadovežem i uposlenike općine Doboj Istok, ima ih koje bi ja mogao preslikati da su ovako kao naš Faruk, ali ima onih koji moraju da nauče da smo mi servis našim građanima i našim privrednicima i da im moramo uvijek stajati na raspolaganju. Na kraju kada se poredi stanje, a ja ću uzeti od kako sam ja načelnik od 2012. godine do dana današnjeg, negdje između 900 i 1000 ljudi je uposleno. Znači da nije potop ovdje, idemo u dobrom pravcu i treba da zadržimo ovaj trend porasta broja uposlenih. Čitali ste izvještaj, izvještaj je fantastičan, imamo sve pokazatelje. Ako uzmemo neke općine našeg ranga, prijeratne općine, koje su prije rata uradile svu infrastrukturu, mi imamo uposlenih kao 2 – 3 te općine. Neću pominjati ni jednu općinu da mi se neki od kolega ne bi naljutio. To su parametri o kojima mi moramo najviše razmišljati, a ne nekim privatnim tamo stvarima ili da ja branim direktora, jer onaj ne brani itd. Ja vam čestitam i nadam se da će u narednom periodu do kraja mog mandata ova saradnja ostati na istom nivou i naravno najsretniji sam, jer nisam čuo ni od jednog privrednika da imaju primjedbe, a rekli bi oni meni da imaju primjedbe na rad naše Porezne ispostave.“*

*Sajib Mešić, zamjenik predsjedavajući Općinskog vijeća: „Zahvaljujem načelničice. Da li još neko želi? Ja ću iskoristiti priliku sa ovog mjesta samo dvije rečenice. Možda ću biti ko papagaj, jer sam na prošlom izvještaju kazao jednu stvar koja je po meni baš pristaje na našeg šefa. Čovjek ne šefuje nego radi zajedno sa radnicima i možda je to ključ uspjeha i imam utisak da čovjek voli svoj posao za šta je na kraju krajeva školovan i kvalifikovan itd. Još jednu rečenicu da bogdom ovu našu raspravu koja je protekla od strane vijećnika čuju njegovim šefovi i njegovim nadređeni to bi bilo dobro za njega, ali i za nas. Da li ima potrebe šef da se obrati? Ako ne, zahvaljujem. Ko je za ovu informaciju?*

*Glasanje: ZA – 12, PROTIV – 0, UZDRŽANIH – 0.*

*Konstatujem da je jednoglasno informacija usvojena i zahvaljujemo šefu na prisustvu.“*

#### **Ad.8. Razmatranje i usvajanje Informacije o higijenskoj ispravnosti vode za piće i stanju vodoprivrednih objekata – JKP „Čisto“ d.o.o. Doboj Istok.**

*Sajib Mešić, zamjenik predsjedavajući Općinskog vijeća: „ Direktor preduzeća je prisutan, otvaram raspravu. Da li neko želi da govori?“*

*Hasan Hasančević, predsjednik kluba vijećnika SDA: „ Ja moram biti iskren nismo se na klubu dotakli ovoga o čemu ću ja pričati, odnosno na šta ću vas podsjetiti, a iskoristit ću priliku pošto su načelnik i direktor tu. Što se tiče informacije Čista pod tačkom 2. radi se o stanju vodnih objekata pa tamo stoji: Na sistemu Klokotnica primjećeno je da rezervoar zvani Zimar u Frkatima postaje nedovoljan u pogledu kapaciteta i zaliha vode, pa se u nekim momentima povećane potrošnje prazni do nivoa kada ugrožava snabdijevanje vodom dijelova naselja koji zavise od njegovog kapaciteta. Za bolje razumijevanje ovog problema navodimo da ovaj rezervoar treba da obezbijedi količine vode za snabdijevanje naselja: Frkati, Mrkani, Habibovići, Gnječe, Brđani, Dizdari, dio Babića, Ahimbašići, Lukavica Rijeka, Čamdžići i centra MFS Duje (troše vode kao i Lukavica Rijeka). Dole je preporuka da se pokuša promijeniti potisni vod između Zimara i gore, odnosno dodati još jedan u kapacitetu od 110 – 160 i evo objašnjeno je koliko to otprilike košta. Ja znam da je stanje pandemije i prirodnih nesreća, poplava i svašta nešto, ja imam informaciju da će se raditi rekonstrukcija puta kroz naselje Frkati što bi u skorije vrijeme bilo izvjesno i mislim da bi taj projekat trebalo iskoristiti ako bi se moglo naći sredstava. Smatram da je visinskim dijelovima mjesne zajednice Klokotnica uključujući Lukavicu Rijeku i Emmaus neophodna ova količina vode. Mi znamo koji radimo sa tim ljudima, pogotovo Emmausu na Dujima kako je ako nestane vode 2 – 3 sata, a da ne govorimo da ne bude dan ili pet dana. Znači da pokušamo, direktore ne treba mi odgovor, saradnja vaša sa načelnikom je dobra, ali da se pokuša iznaći bilo šta pa makar za kupovinu tih cijevi, ako postoji mogućnost da se polože prije rada asfalta.“*

*Kemal Skopljak, vijećnik BPS: „Ja imam samo jedno pitanje za direktora i volio bih da mi objasni vezano za Lanišće Stanić Rijeka neispravan uzorak 2018 i 2019. godine. Da li znate šta je glavni uzrok i zašto dolazi upravo na tom mjestu do neispravnog nalaza? Jeste li provjeravali?“*

*Semir Halilović, vijećnik SDA: „ Obzirom da će direktor izlaziti da odgovara na postavljena pitanja imam jednu dilemu oko načina hlorisanja u redovnoj proceduri, a više u vanrednoj proceduri onako kako to stoji u izvještaju Čista. Možda je dobro da odgovori i doktor kao predstavnik Doma zdravlja koji je možda u tom smislu i stručniji. Jednostavno piše da se vrši dodatno ručno hlorisanje vode u jednom dijelu, a u drugom dijelu da se vrši hiperhlorisanje. Je li regulisano zakonski kako se to radi? Je li to princip manje zlo, bolje da se malo hiperhloriše, nego da pokupimo te bakterije? Vjerovatno me razumijete šta hoću da kažem. Onako kada pročita običan čitalac rekao bi ljudi je li ovo opasno, hoćemo li imati neki problem usljed ovog hiperhlorisanja, pa ako možete da se osvrnete na to.“*

*Sajib Mešić, zamjenik predsjedavajući Općinskog vijeća: „ Zahvaljujem kolegi Haliloviću. Da li želi još neko od kolega? Ako ne želi molim direktora Čista da izađe za govornicu.“*

*Elmir Babić, direktor JKP „Čisto“ d.o.o. Doboj Istok: „Prvo da pozdravim sve prisutne. Što se tiče problema izvorišta Lanišće ako si primijetio i prošle i pretprošle godine taj uzorak desio u oktobru kada imaju veće količine vode. Ima jedan dio oko tog rezervoara kada dođe do zamućivanja i ako se slučajno*

desi u toku noći i ne uspijemo isključiti iz sistema snabdijevanja onda dođe do toga da je uzorak negativan. Obično se u oktobru mjesecu to dešava.“

*Kemal Skopljak, vijećnik BPS: „Jasno mi je to što ste rekli. Da li postoji mogućnost da se spriječi to, jer znate uzrok koji dovodi do toga. Ne znam da li ste svjesni šta to znači za građane tamo kada se to desi naveče, pa oni popiju ujutro vodu, ne znam da li koriste tu vodu. Da li postoji način da vi to definitivno riješite pošto imate dijagnozu.“*

*Elmir Babić, direktor JKP „Čisto“ d.o.o. Doboj Istok: „Rađena je drenaža oko tog izvorišta i tri godine od kako sam ja došao za direktora to je funkcionisalo. Međutim opet su površinske vode našle neki način da uđu. Trebalo bi ponovo uraditi drenažu i površinske vode odvesti od izvorišta.“*

*Sajib Mešić, zamjenik predsjedavajući Općinskog vijeća: „ Zahvaljujem direktore. Pošto smo iscrpili diskusije, ko je za ovu informaciju?*

*Glasanje: ZA – 12, PROTIV – 0, UZDRŽANIH – 0.*

*Konstatujem da je informacija dobila jednoglasnu podršku.“*

***Ad.9. Razmatranje i usvajanje Informacije o higijenskoj ispravnosti vode za piće i stanju vodoprivrednih objekata – JZU Dom zdravlja Doboj Istok.***

*Sajib Mešić, zamjenik predsjedavajući Općinskog vijeća: „ Prisutan je predstavnik Doma zdravlja. Otvaram raspravu, ko želi. Ako neće niko od vijećnika može li predstavnik Doma zdravlja da nam oko hlorisanja pojasni malo.“*

*Dr. Zijad Merdanović, ovlaštena osoba za zastupanje JZU Dom zdravlja Doboj Istok: „ Ja vas sve srdačno selamim i pozdravljam. Što se tiče pitanja vezano za hiperhlorisanje da li je ono štetno i da li šteti zdravlju građana, u takvim kriznim situacijama kada je na neki način ugroženo vodosnabdijevanje kada su pojačane padavine i te površinske vode koje mogu na neki način ugroziti, kratkoročno hiperhlorisanje nema značajnijeg uticaja na zdravlje, međutim dugoročno i ako je to bilo tokom cijele godine naravno hlor ima svoje neke negativne, međutim sigurno manje nego mikrobiološka neispravnost vode.“*

*Sajib Mešić, zamjenik predsjedavajući Općinskog vijeća: „Zahvaljujemo. Stavljam na glasanje. Ko je za ovu informaciju?*

*Glasanje: ZA – 12, PROTIV – 0, UZDRŽANIH – 0.*

*Konstatujem da je informacija dobila jednoglasnu podršku.“*

***Ad.10. Razmatranje i usvajanje Informacije o higijenskoj ispravnosti vode za piće i stanju vodoprivrednih objekata – Mjesna zajednica Brijesnica Mala.***

*Sajib Mešić, zamjenik predsjedavajući Općinskog vijeća: „ Predstavnik nema. Otvaram raspravu. Zahvaljujem. Ko je za ovu informaciju?*

*Glasanje: ZA – 12, PROTIV – 0, UZDRŽANIH – 0.*

*Konstatujem da je informacija dobila jednoglasnu podršku.“*

***Ad.11. Razmatranje i usvajanje Informacije o zloupotrebi narkotičkih sredstava sa prijedlogom mjera za suzbijanje istih na području općine Doboj Istok.***

*Sajib Mešić, zamjenik predsjedavajući Općinskog vijeća: „ Zamjenik komandira Policijske stanice je prisutan. Otvaram raspravu. Dajem priliku pomoćniku komandira vezano za signalizaciju – semafore ako želi.“*

*Elvir Omerčić, zamjenik komandira Policijske stanice Doboj Istok: „Komandir je opravdano odsutan, čovjek je na godišnjem odmoru, pa sam ja prisutan. Gospodinu Izetu Hodžiću što se tiče svjetlosne signalizacije - koliko sam upoznat bila je formirana komisija na nivou općine i naš predstavnik pomoćnik komandira Vehabović je bio u toj Komisiji za bezbjednost saobraćaja. Gospodin načelnik je dao iscrpan odgovor što se tiče toga. Mi kao organ unutrašnjih poslova nismo učestvovali u projektu raskrsnice, a na*

kraju krajeva nismo ni kompetentni, a nismo ni pitani, ali se slažem sa tvojom konstatacijom. Svjetlosna signalizacija – semafori su regulisani vremenski i tu je ostavljen vrlo malan vremenski period što se tiče regionalnog puta iz Lukavice i spajanje sa magistralnim putem. Zamjeniče predsjedavajućeg, ja bih iskoristio ovaj momenat dok sam tu i sve zajedno vas kao instituciju Općinskog vijeća, bila pozicija ili opozicija, zamolio da neko od vas uputi inicijativu da se riješi pitanje autobusnog stajališta za pravac Lukavica – Klokočnica, odnosno regionalni put Klokočnica – Lukavica – Kapetani. Mi imamo doo Avis, ljudi koji rade svoj dio posla i kreću se tim regionalnim putem, pa je ostala ona dosadašnja praksa da oni staju sa svojim autobusom na samoj raskrsnici na pješačkom prelazu. To nama svima zajedno, ne samo policiji, nego i mještanima i građanima stvara problem, jer se ugrožava bezbjednost i dolazi do nervoze, vrućina je pa za i onako malo vremena za zeleno svjetlo kada dođu da se uključe ne mogu od autobusa. Nije samo smisao policije da represivno djeluje i da kažnjava. Ja nisam za kažnjavanje, ali je činjenica da smo milion puta upozoravali te vozače. Mi konstantno dobivamo akt od Avisa da nešto poduzmemo po pitanju nelegalnog prevoza za nelegalne taksiste. Kada je u pitanju doo i oni su u pravu, jer plaćaju svoje obaveze, međutim moraju malo razumjeti i ovu drugu stranu, ali nisu ni oni krivi, jer nema autobusnog stajališta. Vidio si gdje autobusi staju gore kod Zimara na uzbrdici isto gdje je ugrožena bezbjednost, jer prolaze ljudi iz pravca Lukavice i radnici iz Emmausa, gust je saobraćaj i neko će stradati. Hvala Bogu nije bilo tih nezgoda sa smrtnim ishodom, kao što je bio slučaj u Maloj Brijesnici. Ja vas molim da vidite mogućnost u nekom periodu, a evo idu izbori, da se iskoristi i da se riješi taj problem autobusnog stajališta. Predsjedavajući, ako ima još pitanja ja sam tu.“

*Kemal Skopljak, vijećnik BPS: „Kada ste već otvorili to pitanje ja bih samo nadovezao kratko. Znači nije samo to problem, mi imamo jedan daleko veći problem kojeg niko ovdje nije spomenuo vezano za izlazak hitne iz kruga. Ovo je katastrofa, ja radim taj posao i znam šta znači pet minuta ili tri minute kada moram čekati na tom dijelu. Bilo bi lijepo da mi svi razmislimo o tom pitanju, da li se to može riješiti na neki drugi način, da izađemo u susret tim ljudima da jednostavnije izađu na glavnu magistralu, jer pet minuta čekati ondje nekome život znači svi mi to znamo i svih nas se to tiče.“*

*Hasan Hasančević, predsjednik kluba vijećnika SDA: „ Vi znate da smo mi na jednom od Vijeća dali saglasnost za kupovinu zemlje iza Doma zdravlja po pitanju rješavanja saobraćaja oko doma kulture i parkiranja vozila. Evo ušlo se u tu proceduru, zemlja se kupila i dogovorene su neke radnje da se to radi, ali ispala je pandemija i ogromna sredstva trebaju da se dovede ona putna infrastruktura iza Doma zdravlja, stari put je bio, nekategorisan i uzak. Znači gore će biti parking prostor i izlaz sa one strane. Dali smo zahtjev i Elektrodistibuciji, jer treba izmjestiti trafo, koji je kraj ceste i koji je znate već koji put udaran. Dobili smo da općina treba da plati izmještanje, ali to su neke tehničke stvari gdje je prebacivanje problema. Znači odgovorno tvrdim to bi trebalo biti riješeno na najbolji mogući način, ali treba strpljenja još malo. Komisija je upoznata sa tim stvarima da je kupljena zemlja i da bi ovaj dio puta trebao biti zatvoren za izlaz od doma kulture. Ulaz je u redu i da se napravi između zubarske ordinacije prolaz da se može ići i da ovi iz hitne samo okrenu vozila i idu gore, ali treba nam vremena. Mislim da nam sada treba i para, ali i vremena da to završimo, samo strpljenja molim vas.“*

*Semir Halilović, vijećnik SDA: „ Očigledno je da je Izo inicirao ne jedan problem, nego nekoliko problema koji su nažalost vezani za tu raskrsnicu. Ovo što je Hasko govorio ono što se može riješiti, a što je u našoj nadležnosti, da se rješava. Ja nisam mislio da budem cjepidlaka, ali kada je zamjenik komandira to pomenuo ja ne znam imate li vi osjećaj pored ove kratkoće kada dolazite iz Lukavice na magistralu, a i iz pravca Doboja u Lukavicu kada se skreće, pored toga što je jako kratko ja mislim da u određenim uslovima svjetlosti vani onaj prvi ne vidi ni zeleno ni crveno svjetlo. Ja sam mislio da se radi samo o meni, međutim imao sam priliku već nekoliko puta da budem drugi ili treći u prestrojavanju i onaj prvi ne vidi. Znate kada krene? Kada sviraju od pozadi, a do tada već pređe svjetlo u crevno. Vjerovatno kada pri prestrojavanju dođe blizu da iz ugla ne vidi dobro zeleno i crveno svjetlo. Mislim da vozači imaju dilemu, jer i ja imam dilemu da li se uopšte taj senzorski dio mora nagaziti da bi u vremenu kada nema frekvencije proradio. A da bi se nagazio apsolutno ona signalizacija, ona linija dole, se ne može ispoštovati, jer se mora nagaziti i sviraju obično pozadi onome naprijed da dođe još malo. Ja nikada nisam imao priliku da razgovaram sa doktorom Konjićem, jer je on sa jednog sastanka išao iza mene, a čovjek je bio ispred mene, pljusak je bio nevjerovatan i nevjerovatno mnogo vremena je prošlo a zeleno svjetlo se nije upalilo, pa sam bio u dilemi da li kiša ometa senzore. Pored te kratkoće vremena mislim da je ovo fenomen po dani, jer ne vidi nažalost onaj prvi to svjetlo, a vidi se i kako se ljudi nagingu iz auta ne bi li*

ugledali to svjetlo. Razgovaramo samo i nisam mislio to reći, ali kada je zamjenik komandira to pomeuo oko kratkoće trajanja zelenog svjetla mene je iniciralo da kažem neka svoja razmišljanja.“

*Sajib Mešić, zamjenik predsjedavajući Općinskog vijeća: „Zahvaljujem kolega. Ima li još neko po ovoj tački? Ja bih se zahvalio zamjeniku komandira Policijske uprave na sugestijama vezanim za autobuska stajališta prema Lukavici Rijeci i ja ću preložiti jedan zaključak da načelnik sa službom provjeri neke tehničke mogućnosti sa kantonalnom direkcijom za puteve da vide da li postoji mogućnost za neko tehničko rješenje kako bi se uspostavila autobuska stanica vezana pravac Lukavica Rijeka. Izvolite načelniče.“*

*Kemal Bratić, općinski načelnik: „Kao što znate cesta Klokočnica – Kapetani od nedavno je na federalnom Parlamentu usvojena i ona je sada konačno proglašena regionalnom cestom. Gazdovanje nad njom će preuzeti Regionalna direkcija cesta Tuzlanskog kantona. Mi smo nedavno imali sastanak, ja sa saradnicima i direktor Regionalne direkcije cesta sa svojim saradnicima i krenuli smo u tu priču i pominjali smo autobuska stajališta. Ono što je sada bitno jeste da imamo puno posla oko imovinsko pravnih odnosa da bi to sve regulisali i stavili na papir, odnosno i ova današnja odluka je vezana za to. ono što su mi rekli jeste da je planirano u ovoj godini oko 300.000 KM ulaganja dionica puta u Klokočnici i kako sam ja razumio tu bi i bila autobuska stajališta. Naravno mi bi bili sretni da možemo odmah ovdje iz semafora staviti, ali nemamo svog zemljišta i odmah na taj način to i otpada, tako da ćemo tražiti neka druga alternativna rješenja za ta autobuska stajališta. Ja to iskreno prepuštam struci i oni će to uraditi. Isto kao i ovo, svi mi vidimo da je kratkoća, ali opet je bolje. Uporedit ću samo susjedni grad Doboj kada izlazimo na magistralni put, ono je luda kuća u odnosu na ovo. Ne znam kako bih se izrazio da me ko krivo ne shvati, kada je nešto kod nas onda svi tražimo, a kada odemo negdje drugo, pogotovo ako putujemo vani, stojimo po 3 sata, niti ko šta obavještava, niti govori i ništa, stojiš i Alahimanet. Znači stajati je nema ti druge, a tako je i u drugim gradovima. Znači ovo ovdje je po meni solidno rješenje, a može biti i bolje naravno uz otklanjanje ovih sitnih nedostataka. Semafor je poprilično regulisao i olakšao izlazak na magistralni put. Ne smijemo zaboraviti da mi imamo tu 10660, čini mi se, stanovnika, a imamo isto toliku frekvenciju stanovnika iz susjednih općina, a možda i više. Znači iz Doboja, iz Sjenine i Gračanička općina, jer im je put zatrpan i koliko znam Malešići –Prnjavor nisu spojeni i prisiljeni su da idu ovdje. Nama bi puno rasteretilo da se taj put uradi, jer vi vjerovatno oni koji su bliže putovali na taj način. Mi im ne možemo zabraniti i mi radimo na tome, a dobra stvar je da je regionalna cesta preuzela tu nadležnost. Razgovarali smo o ovom uskom grlu poslije semafora gore do mosta i most, da proširimo tu dionicu i razgovarali smo o Lukavici Rijeci vezano za poplave i otvorili smo sva ova pitanja koja su sada konačno u njihovoj nadležnosti, jer do sada su nam uvijek govorili ne možemo ulagati sredstva nije to regionalni put. Ja vjerujem da ćemo u narednom periodu, a bit će i rebalans kod njih u toku ove godine, vjerovatno neke stvari pokušati zajedničkim snagama popraviti. Nadam se da sam odgovorio na pitanja, a spreman sam još ako treba.“*

*Sajib Mešić, zamjenik predsjedavajući Općinskog vijeća: „Zahvaljujem načelniče. Da li još neko želi? Ko je za ovu informaciju?*

*Glasanje: ZA – 12, PROTIV – 0, UZDRŽANIH – 0.*

*Nema potrebe za zaključkom načelnik je pojasnio o čemu se radi.“*

**Ad.12. Razmatranje zahtjeva Mehmedović Muhameda iz Brijesnice Velike za davanje saglasnosti susjeda.**

*Sajib Mešić, zamjenik predsjedavajući Općinskog vijeća: „Vidjeli ste o čemu se radi, to je neka naša ustaljena praksa. Otvaram raspravu, da li neko želi? Ne želi. Ko je za ovaj zahtjev da se usvoji?*

*Glasanje: ZA – 10, PROTIV – 0, UZDRŽANIH – 2.*

*Konstatujem da je zahtjev dobio potrebnu većinu. Na kraju želim da vas, uvažene kolege, podsjetim na svečanu sjednicu i na program obilježavanja i time smo završili 37. sjednicu. Zahvaljujem.“*

*Sjednica je završena u 11,50 sati.*

ZAPISNIČAR  
Behara Hadžić

SEKRETAR  
Omer Hadžić

ZAMJENIK PREDSEDVAJUĆEG  
OPĆINSKOG VIJEĆA  
Sajib Mešić



*Službena zabilješka:*

*Zapisnik je usvojen na 1. vanrednoj sjednici Općinskog vijeća Doboja održanoj dana 14.08.2020. godine.*

*U Klokotnici, dana 19.08.2020. godine*

*Zabilješku sačinio  
Omer Hadžić, sekretar Općine*